

CONVENIO DE COLABORACIÓN EN MATERIA DE VIOLENCIA NO ÁMBITO
SANITARIO ENTRE O SERVIZO GALEGO DE SAÚDE E A FISCALÍA DA
COMUNIDADE AUTÓNOMA DE GALICIA

Santiago de Compostela, 11 de setembro de 2012


Dunha banda, Rocío Mosquera Álvarez, conselleira de Sanidade e presidenta do Servizo Galego de Saúde, de acordo co disposto no artigo 34 da Lei 1/1983, de 22 de febreiro, reguladora da Xunta e da súa Presidencia, modificada pola Lei 11/1998, de 20 de outubro, e de conformidade cos Decretos 310/2009 e 311/2009, de 28 de maio, polos que se establece a estrutura orgánica da consellería de Sanidade e do Servizo Galego de Saúde, respectivamente, e co establecido da Lei 4/2006, de 30 de xuño, de Transparencia e Boas Prácticas na Administración Pública galega, así como na Lei 30/1992, de 26 de novembro, de réxime xurídico das Administracións Públicas e do Procedemento Administrativo Común.

Doutra banda, Carlos Varela García, Fiscal Superior da Comunidade Autónoma de Galicia, designado como tal polo Real Decreto 1559/2009, do 9 de outubro (Boletín Oficial do Estado nº 245, de 10 de outubro), que ostenta a representación e xefatura do Ministerio Fiscal en todo o territorio da Comunidade Autónoma de Galicia, de conformidade co disposto no artigo 22.4 do Estatuto Orgánico do Ministerio Fiscal, aprobado pola Lei 50/1981, de 30 de decembro, modificada pola Lei 24/2007, de 9 de outubro.

Ambas as dúas partes, no exercizo das competencias que teñen atribuídas, recoñécense mutua capacidade para a subscrición do presente convenio de colaboración e, en consecuencia,

EXPOÑEN

O artigo 43 da Constitución española recoñece o "dereito á protección da saúde" e establece que "compete aos poderes públicos organizar e tutelar a saúde pública a través das medidas preventivas e das prestacións e servizos necesarios."



Así mesmo, a Lei 8/2008, de 10 de xullo, de saúde de Galicia, establece que o Servizo Galego de Saúde, creado pola Lei 1/1989, de 2 de xaneiro, é un organismo de natureza administrativa dotado de personalidade xurídica propia e plena capacidade para o cumprimento dos seus fins.

O Ministerio Fiscal ten atribuída constitucionalmente a misión de promover a acción da xustiza en defensa da legalidade, dos dereitos dos cidadáns e do interese público tutelado pola lei, de oficio ou a petición dos interesados.

Entre os instrumentos que o ordenamento xurídico pon á súa disposición para cumprir ese propósito, está a facultade de exercitar as accións penais e civís derivadas de delitos e faltas, cando proceda, así como a posibilidade para recibir denuncias e levar a cabo ou ordenar, para o esclarecemento dos feitos denunciados, a práctica daquelas dilixencias para as que esté lexitimado pola Lei de Axuizamento Criminal, podendo ordenar a detención preventiva. Do mesmo xeito, cando a investigación evidencie feitos de significación penal, poderá formular ao efecto a oportuna denuncia ou querrela ante a autoridade xudicial (artigo 5 da Lei 50/1981 de 30 de decembro, reguladora do Estatuto Orgánico do Ministerio Fiscal).

O Fiscal Xeral do Estado fixou na consulta 2/2008, de 25 de novembro, os requisitos e o alcance da protección penal de que disfruta o persoal facultativo no ámbito da sanidade pública, unificando os criterios interpretativos das distintas fiscalías. Así mesmo xerou inqueda nas institucións afectadas, que desexen exercer as competencias que ten asignadas polo ordenamento xurídico de xeito que poidan contribuir á redución das agresións.

Os órganos directivos do Servizo Galego de Saúde impulsarán a persecución dos episodios de violencia contra o persoal do Servizo Galego de Saúde e a denuncia daqueles feitos cando así esté permitido polas leis, para non deixar soa a vítima na persecución do agresor.

As partes asinantes entenden necesario coordinar os seus esforzos para combater e, na medida do posible, diminuír e evitar a aparición de resultados lesivos, tanto físicos como morais, que teñan a súa orixe en agresións contra os empregados públicos, sanitarios e non sanitarios, que prestan servizos en centros públicos dependentes do Servizo Galego de Saúde.



A large, dark handwritten signature, possibly in black ink, located on the right side of the page. The signature is stylized and appears to be a single continuous stroke.

Manifestan así a súa vontade de mellorar a investigación e persecución de tales agresións e garantir a realización de todas as actuacións encamiñadas á súa sanción, mediante a colaboración, cooperación e comunicación entre as dúas institucións, cada unha delas no marco das atribucións que teñen legalmente asignadas.

As partes conveñen en destinar as medidas adecuadas para tal fin así como para protexer tamén a integridade e o prestixio profesional do persoal do Servizo Galego de Saúde.

En consecuencia, acordan subscribir o presente convenio de colaboración, con suxección ás seguintes

CLÁUSULAS

PRIMEIRA-. Obxecto

O obxecto do presente Convenio é contribuir á diminución das agresións contra os profesionais do Servizo Galego de Saúde, articulando os mecanismos de cooperación necesarios para asegurar a existencia e funcionamento das canles de información recíproca indispensables en orde ao avance da eficacia na investigación, persecución e castigo das ditas agresións.

SEGUNDA -. Compromiso de dotación de medios.

As partes velarán, no marco das súas respectivas competencias, pola dispoñibilidade dos recursos humanos, materiais e técnicos para a efectividade do presente convenio.

A sinatura do presente convenio de colaboración non conlevará custo económico para ningunha das partes asinantes.

TERCEIRA -. Difusión interna do convenio.

Cada unha das partes comprométese a elaborar as instrucións internas necesarias para difundir o contido do presente Convenio e para que os órganos ou servizos que delas dependen axusten os seus procedementos de actuación ao estipulado no mesmo.



A large, stylized handwritten signature in black ink, located on the right side of the page.

CUARTA.-Compromiso de actuación das partes.

As partes asinantes comprométense a seguir, de acordo coas atribucións que a cada unha delas outorga o ordenamento xurídico, o compromiso de actuación que se inclúe como anexo ao presente Convenio, a fin de facilitar as accións inmediatas para a denuncia, sanción e represión das agresións contra profesionais da sanidade pública que prestan os seus servizos en centros dependentes do Servizo Galego de Saúde e para o mantemento da súa dignidade profesional.

QUINTA-. Comisión Mixta de Seguimento.

Para levar a cabo o seguimento e avaliación das accións previstas no presente Convenio, constituirase unha Comisión Mixta de Seguimento, composta por dous representantes designados por cada unha das entidades asinantes.

A Comisión, que se reunirá por iniciativa de calquera das partes tantas veces estimen oportunas, desempeñará as seguintes funcións:

1. Impulsar e avaliar o cumprimento do presente Convenio, propoñendo as actuacións que se consideren necesarias para tal fin.
2. Interpretar, en caso de dúbida, o contido do mesmo.
3. Propoñer ás partes a resolución das posibles controversias que poidan xurdir na súa aplicación.

SEXTA-. Vixencia e extinción.

A vixencia do convenio estenderase ata o 31 de decembro de 2013, poidendo ser prorrogado por períodos de dous anos a petición de calquera das partes, que deberá comunicar a dita prórroga á outra parte cun mes de antelación á data de finalización do Convenio.

Do mesmo xeito, a constatación da ineficacia do funcionamento dos instrumentos de cooperación establecidos será causa de resolución do convenio. En tal caso, calquera das partes, comprometéndose a negociar de boa fe a mellora daqueles antes da ruptura, poderá denunciar o citado convenio cunha antelación mínima de tres meses á data de finalización do mesmo.



En calquera caso, a extinción do convenio non afectará á culminación das actividades iniciadas co anterioridade á súa extinción.

SÉTIMA-.Natureza e xurisdición.

O presente Convenio de colaboración ten natureza administrativa, quedando excluído do ámbito de aplicación do Real decreto legislativo 3/2011, de 14 de novembro, polo que se aproba o texto refundido da Lei de contratos do sector público.

A resolución dos conflitos que poidan xurdir durante a vixencia do presente Convenio, no caso de que non poden ser resoltos pola Comisión de Seguimento, corresponderá á xurisdición contencioso-administrativa.


En proba de conformidade cos termos deste Convenio, as partes comparecentes o asinan e rubrican por triplicado exemplar e a un único efecto, no lugar e data arriba sinalados.

A Presidenta do Servizo Galego de
Saúde,

A circular official stamp of the Galician Health Service (Servizo Galego de Saúde) is visible. The stamp contains the text 'COMUNIDADE DE GALICIA' at the top, 'CONSELLEIRA' in the center, and 'CONSELLERÍA DE SAÚDE' at the bottom. A handwritten signature in black ink is written over the stamp.

Rocio Mosquera Álvarez

O Fiscal Superior da Comunidade
Autónoma de Galicia,

A large, stylized handwritten signature in black ink is written on the page.

Carlos Varela García

ANEXO

COMPROMISO DE ACTUACIÓN PARA O CASO DE AGRESIÓNS CONTRA PROFESIONAIS DO SERVIZO GALEGO DE SAÚDE NO TERRITORIO DA COMUNIDADE AUTÓNOMA DE GALICIA

Co obxectivo de acadar unha colaboración máis directa e áxil entre o Servizo Galego de Saúde e a Fiscalía Superior da Comunidade Autónoma de Galicia no axeitado tratamento dos episodios de violencia contra os profesionais do Servizo Galego de Saúde, as partes, no exercizo das súas funcións, asumen as seguintes obrigas:

1 -. Servizo Galego de Saúde:

O Servizo Galego de Saúde definirá, habilitará e implementará as canles e protocolos de actuación necesarios para informar e asesorar a todos os profesionais do Servizo Galego de Saúde sobre os pasos a seguir no caso de sufrir unha agresión no exercizo das súas funcións. Así mesmo, proporcionará o apoio e a atención axeitada ao profesional vítima dun episodio de violencia. Para elo elaborará un procedemento onde se estableza:

- a) Os sistemas de comunicación interna e de rexistro que garantan unha axeitada resposta ao incidente de violencia por parte da Administración.
- b) O circuío dos partes de lesións, denuncias e demais documentos que poden derivar do incidente violento para a súa rápida remisión aos órganos competentes da Administración xudicial.
- c) As actuacións de apoio ao profesional vítima dun incidente violento que procedan (atención médica, asesoramento xurídico, apoio psicolóxico ...).

En cada institución sanitaria designarase unha persoa responsable do envío ao Ministerio Fiscal que corresponda en función do ámbito territorial, dos formularios e documentación pertinente para o seu coñecemento e inicio das actuacións.

De acordo co artigo 262 da Lei de Axuizamento Criminal, o dito envío incluirá:

-Denuncia.


-Parte de lesións.

-No caso de tramitarse a incapacidade temporal a resultas da agresión: cualificación de continxencias e documentación pertinente.

Nos casos de agresión física con lesións, o lesionado procederá, no seu caso, á interposición dunha denuncia ou querela penal. Así mesmo, cando a agresión sexa susceptible de constituír un delito contra a honra, tamén se comunicará ao Ministerio Fiscal que, de acordo co disposto no artigo 215.1 do Código Penal, procederá de oficio.

No suposto de agresións xa denunciadas con anterioridade, comunicarase á Fiscalía con traslado da documentación que corresponda en virtude da información da que se dispoña, xuntando copia da denuncia presentada anteriormente, atestado e parte de lesións e, no seu caso, os datos relativos ao xulgado que estivese ao tanto da mesma, a clase e o número de procedemento incoado.


2.- Fiscalía:



a) Recibida a denuncia, o/a fiscal competente incoará as oportunas dilixencias de investigación, poidendo ordenar a práctica das dilixencias que estime oportunas, ao término das que acordará, mediante o correspondente decreto, a súa remisión ao xulgado de instrución competente se apreciase indicios suficientes da existencia dunha infracción criminal, ben sexa delito, ben sexa falta, e comunicará tal resolución ao denunciante.

Se, polo contrario, o/a fiscal estimase que o feito non reviste os caracteres de infracción penal, decretará o arquivo das dilixencias de investigación comunicándoo ao denunciante quen, no seu caso, poderá reiterar a súa denuncia ante o/a xuíz/a de instrución competente.

Nos casos de agresións xa denunciadas con anterioridade, o/a fiscal verificará o estado da denuncia xa presentada e procederá ao seu seguimento singularizado.



b) O/a Fiscal Superior dará as instrucións oportunas para que cada un dos procedementos que se incoen sexa obxecto dun particular seguimento por parte dos fiscais competentes en cada caso.

c) Os/as fiscais dos ámbitos territoriais correspondentes terán en conta as circunstancias do desempeño efectivo da función pública sanitaria en relación cos elementos do delito de atentado para dispensar a pertinente protección xurídica aos profesionais que realizan a dita función en canto que personifican o dereito á protección da saúde da cidadanía e son susceptibles de ser vítimas do referido delito de atentado.



A large, stylized handwritten signature in black ink, consisting of a large loop and a long horizontal stroke extending to the right.